



UNIVERSITI
TEKNOLOGI
MARA

Cawangan Negeri Sembilan
Kampus Rembau

2024

RONA TINTA

e-BULETIN
EDISI
2024

FAKULTI PENGURUSAN & PERNIAGAAN
UNIVERSITI TEKNOLOGI MARA
CAWANGAN NEGERI SEMBILAN, KAMPUS REMBAU



CHIEF EDITOR
SYAZLIANA KASIM

EDITORS
FARRAH OTHMAN
NOOR AZILLAH MOHAMAD ALI
SHAHRUL AMRI AB WAHAB
DR. HAFIZ ALI, M.





PERKAHWINAN JARAK JAUH (PJJ)

NOOR AZILLAH MOHAMAD ALI & SHAHRUL AMRI AB WAHAB

Berkahwin adalah salah satu sunnah Nabi Muhammad SAW. Jika ada yang ingin hidup membujang, ini jelas menunjukkan ia adalah bertentangan dengan sunnah. Menurut hadis yang diriwayatkan oleh Sa'ad bin Abi Waqqas RA bahawa Rasulullah SAW bersabda yang bermaksud “Berkahwinlah kamu dan beranak pinaklah kamu dengan banyaknya, sesungguhnya aku akan berbangga dengan kamu berbanding umat lain pada hari akhirat nanti.” (Riwayat Abu Dawud dan al-Hakim)

Menurut Dewan Bahasa dan Pustaka, kahwin itu sendiri membawa kepada perikatan yang sah antara lelaki dengan perempuan, menjadi suami isteri adalah satu perikatan sah. Perkahwinan itu sendiri adalah satu perkongsian hidup antara pasangan suami dan isteri. Tetapi apa yang dimaksudkan dengan Perkahwinan Jarak Jauh (PJJ)? Menurut kajian (Rafeah, Hidayatul Sakinah binti Mohd, & Azhar Abd, 2021), mengatakan ia adalah satu corak hubungan yang bercirikan pertemuan yang jarang dilakukan antara suami dan isteri. Pasangan suami isteri ini tinggal di lokasi geografi yang berbeza dengan tempoh berjauhan antara satu sama lain. Kementerian Pembangunan Wanita dan Kebajikan Masyarakat merekodkan bahawa ini adalah model kekeluargaan yang menjadi dominasi masyarakat ini.

Menurut Perunding Motivasi Dan Kaunseling Keluarga, Dr Robiah K Hamzah berkata PJJ ini bukanlah satu perhubungan yang digalakkan dalam islam dan banyak impak negatif. Berdasarkan kajian oleh (Sandow, 2014) perhubungan jarak jauh membawa kepada kadar perpisahan yang tinggi. Tambahan kajian oleh (Rafeah et al., 2021) mengatakan peratusan perceraian juga disebabkan oleh model perkahwinan ini. Dalam perkawinan jarak jauh kegagalan komunikasi yang efektif juga memberikan penyumbang kepada masalah antara pasangan suami isteri. Dengan ini akan mewujudkan jurang antara pasangan (Aguila, 2009).

Sebelum perkahwinan, setiap pasangan perlu membuat penelitian yang terperinci bagaimana kehidupan mereka selepas berkahwin kerana bukannya mudah untuk melayari perkahwinan jarak jauh ini. Setiap perkahwinan akan diuji. Ujian itu datang daripada beberapa aspek dan ujian yang dihadapi oleh setiap pasangan adalah berbeza. Sememangnya hidup ini adalah pilihan, ada yang tidak sanggup berjauh dengan pasangan, maka salah seorang perlulah berkorban memilih samada kerjaya ataupun keluarga.

Keadaan yang memaksa untuk meneruskan perkahwinan jarak jauh ini kerana tuntutan kerjaya. Dalam keadaan yang serba mahal kini, di mana tidak memadai hanya seorang sahaja yang bekerja. Peluang pekerjaan yang jauh dari pasangan perlu dipikul demi kelangsungan hidup. Sesungguhnya model perkahwinan ini bukannya perlu diagungkan kerana tanggungan adalah tinggi di mana ada dua kos yang perlu dikeluarkan. Bak kata orang "dua dapur" perlu diagihkan. PJJ bukanlah pilihan yang terbaik tetapi keadaan yang memaksa untuk meneruskan kehidupan begitu. Jika disenaraikan sememangnya banyak negatif daripada positif. Apakah daya kehidupan perlu diteruskan.

Janganlah dikecam dengan perkahwinan jarak jauh ini atau juga dipanggil keluarga komuter oleh Kajian Lembaga Pembangunan Penduduk dan Keluarga Negara (LPPKN), di mana golongan ini berjauhan adalah kerana tuntutan ekonomi seisi keluarga. Seperti dikatakan tadi, kos yang berganda dan juga risiko berdepan dengan kemalangan semasa berulang-alik. Jangan ditanya mereka ini dengan soalan yang menjengkelkan seperti "sampai bila hendak begini", "tidak pernah untuk memohon pertukaran ke", "tidak risau ke pasangan curang" dan bermacam-macam soalan yang keluar dari mulut penyibuk tanpa berfikir. Keluarga komuter ini berkemungkinan telah berusaha bermacam-macam cara untuk menamatkannya tetapi Allah belum mengizinkan. Kita yang mengetahui ada di kalangan rakan-rakan kita dalam kategori keluarga komuter ini, teruskan berdoa untuk kelancaran mereka untuk mengharungi kehidupan ini. Ingatlah tiada pasangan yang ingin berkelana seorang di utara, seorang di timur tetapi demi tuntutan ekonomi mereka ini gagahi jua. Allah Pemberi Rezeki, terus berusaha dan berdoa. Tiada perkahwinan jarak jauh inginkan perpisahan, jika ianya berlaku bukan disebabkan model perkahwinan itu sendiri tetapi ketentuan Allah.

Rujukan

Aguila, A. P. N. (2009). Living long-distance relationships through computer-mediated communication. *Social Science Diliman*.

Rafeah, S., Hidayatul Sakinah binti Mohd, Z., & Azhar Abd, A. (2021). Perkahwinan Jarak Jauh Dalam Kalangan Masyarakat Islam Di Malaysia Menurut Perspektif Fiqh Dan Undang- Undang Keluarga Islam. *Journal of Fatwa Management and Research*, 26(2), 211-226. doi:10.33102/jfatwa.vol26no2.393

Sandow, E. (2014). Til work do us part : the social fallacy of long-distance commuting. *Urban Studies*. doi:10.1177/0042098013498280